

輯一

來去旅行



旅行地圖

地圖 thí-- 開

好好仔 kā 我上地理課！

Lán è 城市

你去過幾個地頭？

內底有啥 mih 故事？

Lán è 溪河

你 kám 有去揣 in è 源頭？

內底有你細漢時 è 記持 -- 無？

Hia-è koân 山

內底你去過幾個所在？

Kám bat tī 春夏秋冬四季去 hia 行踏？

Hia-è 族群

內底你有偌濟朋友？

你 kám 有法度用 in è 話

Kap in ãi-sat-chuh ？

地圖 thí-- 開

好好仔教家己認 bat 故鄉

Chia m̃ 是旅社，ho-thé-luh

Thí 開地圖

開始走揣生份 è 所在

一步一步行踏

Kā 跤跡留 -- 落 - 來

完成一張家己 è 性命地圖

地圖 thí-- 開

回鄉起行

旅行者

紛亂 è 時間 kap 空間

Hō 人頭眩目暗

Ti 世界各國走跳 è 旅行者

按怎理解旅行 è 意義

Koh 有心內 è 地圖是 m̄ 是來錯亂

Iah 是用殖民者 è 心態

行踏任何一個生份 è 所在

Beh kā 收起來做家己 è 地頭

我想旅行者是 leh 刺激故鄉 è 滋味

愈遠愈芳

我 koh 想

伊 kám 有法度

完成伊 è 旅行 tng-- 去

伊 è 歸屬

Koh 免驚拍無-- 去

記持若有一工

Ná 來 ná 重

是 beh 按怎來選擇

放 sak 旅程？Iah 是放 sak 記持？

Tng 來故鄉 iah 是繼續完成？

旅行者心內的確無法度回答

因為 lán lóng 是城市 è 旅行者

Tiāⁿ-tiāⁿ 揣無 tng-- 去 è 路

◆ 註：我 mā beh 變成荷蘭 è 旅客--ah，想想--leh，lán tī 一般生活當中，
iah 是讀冊 lóng 是旅行者。2016/9/16

城市 bāng

半暝 sa-bui-sa-bui ê 雙目猶原 m̄ 甘歇睏

Thoah 開記持 ê 屨仔內底滿滿 ê 相思

陷眠 ê 腦

Koh leh 搬一齣 koh 一齣 ê 戲局

過去 hō 青春炒熟 ê 文字

漸漸退燒

過去 ná 吸石 ê 意志

漸漸無力

街頭 iān-jín khòk-khòk-chhan

Hit 隻跛跤 ê 烏貓咪 bih tī 胸坎

保護 lán ê 夢

起 chhio ê 街仔路電火閃爍

扭曲光線路

Beh háⁿ lán 淺薄 ê 信仰

沖一泡茶

無味

點一枝薰

無味

激力寫百外 chōa ê 詩

Hit 張紙猶原是白 --ê

激情演奏 ê 曲盤

是一首無 mé-loh-lìh ê 歌

Kan-taⁿ

大聲 hiàm-hoah 城市無夢也無望

光批

倚 tī 國外街仔路，揣 khah súi ê 光批
 平常 lóng 是用 í-mè-luh，一下仔就收 -- 著
 Thài-thó beh chiah 麻煩
 He 是滿足啥？
 出國 chhit-thô chiah leh 寫光批 -- leh
 寄 hō 朋友 m̄ 是 leh 思念 -- in
 好 -- lah，心內有淡薄仔掛礙
 上致意 -- ê 是 kā in 講 tī 國外
 外口 ê 月娘有偌大
 Kap n̄g 望 in ē-sái 替我歡喜 koh 看見 koh-khah 大 ê 世界
 後擺，chiah 同齊出 -- 來
 光批後壁 ê 美景是 beh hō in 鼻國外 ê 味
 Siáⁿ in ê 心
 Hit 張薄薄 ê 郵票有無形 ê 翼股
 因為字 ê 重量不止仔重
 飛 beh chiaⁿ 禮拜
 來到手頭
 家己 mā 寫 hō 家己

「N̄g 望 koh 後 -- 改 ê 旅行」
 頂 koân ê 印仔寫「有閒 chiah-koh 來」

母親是山

Beh 4,000 公尺 koân 頂

新高山 揣--你

想講 è-tàng 看盡你 è 祕密

想 beh kā 你講肩胛頭 è 重量

揸 3、40 公斤 è 思念

Üi 東埔溫泉一 chōa 路踢--起-來

一步一步 lóng 踏入你心槽

叫母親--啊 我來--ah

你 soah 來 bih--起-來

是 m̄ 是你 teh 受氣

怪阮無 tiā" 來 kā 你看顧

怨嘆 吐 khùi

無願意 hō 阮看你滄桑 è 模樣

一入山林，m̄ 知人間

笑--lah

脫離紛亂 è 社會

大聲笑--lah

免聽著 ak-chak è 抗爭

笑--lah

Suh 大自然 è 空氣

Lim 冰清 è 溪水

柴箍燒 leh 圍做伙

Khah 大聲笑--leh

Che 是阮 è 仙界

M̄-thang koh 笑--落-去

千年樹仔剝了了

山崩--落-去

前人跣跡 已經消失 tī 谷底

親愛 è 朋友 揣無路 thang tít

M̄-thang 笑--ah

胡蠅蠓蟲是你帶--來--ê

你是有傳染病ê邪神

水鹿仔ê殺手

烏熊ê生死判官

無良心--ê 你繼續笑--啊

Beh hâu ?

好--lah , hâu khah 大聲--leh

用目屎洗tng che受傷ê土地

用雙跤巡邏pit-sùn ê空喙

Háu--lah , mài gêng tī心肝頭

Che 是對土地ê認同

Che 是對土地ê m̄甘 心疼

Mài koh hâu--ah

Koh hâu mā 無khah-choah

好--lah

Beh 笑 beh hâu

隨在--你--lah

凡間

落山後

世界顛倒

人思想顛倒

我suh無khùi 胸坎chát-chát

驚醒

全街仔路ê人kap車

Lóng死亡àu臭

是夢

行入凡間ê後果

肩頭ê重擔

繼續taⁿ--起-來

路繼續鋪--落-去

Lán繼續行--落-去

有一日

Tng 去山內

祖靈tī hia thèng候lán ê懺悔